

Dancà y da na pert

Uedli y oredles daverc sun la sozieté ladina d'aldidancuei

Cater ciacoles col Krampus de Sèn Nicolò



Èl ciaut ju te l'infern?

No l'é nience mal. L'é tant de temp che son ju che m'é secià fora, m'é usà!

Èste dut l'an chel peil lonch? O te l taeste?

L'é semper chel, giusta via per l'istà vae dal barbier a me l taar mingol.

Siede vegnui su da l'infern de n muie?

Ma n toch en su ben, dapò se aon sparti fora e ogneun l'é jit dò soa strada.

Da tant èl che vegnide te Fascia?

Oramai sarà diesc egn che vegnon chiò, dant jiane da autre man.

Olà siede stac amò?

Via per l'Africa e per l'America, dapò gio e mie amisc aon dezidù de vegnir olache fasc più freit, percheche proprio asegn deldut no sion...

Èl n viac lonch a vegnir su da l'infern?

A ruar chiò l'é béleche doi setemane de viac. Via pura che chiò o l'infern no muda pa trop noe, i é duc tant nervousc che somea più o manco valif.

Con che meso siede vegnui su?

N'outa Sèn Nicolò vegnia a ne tor n toch en ju e montaane su la lesa con el. Ades vegnon su mingol dant percheche i bec taca a doventar semper più catives.

Co fajede a entener se n bez l'é valent o catif?

Basta vardar tant che l sciampa canche l ne veit.

Che ge fajede ai bec catives?

Aon proà a n portar ju dotrei te l'infern ma n toch en ju i n'é semper sciampé e dapò i ne fasc ence mingol de pecià, percheche i é amò picoi. I à amò temp ic de ruar colajù. N fossa ben de più gregn da portar jù piutost.

Ge aede fat poua ence a chi gregn donca?

Ei, ei, ben segur e n'é pa stat n muie che à abù poua che se i tolassane dò.

E de Sèn Nicolò, aede poua?

Ma na, na. L ne bega ben, ma più che tant no l ne disc e ogne

tant l'é el che ne mana dò i bec.

Ve sèl bel ge fèr poua ai bec?

Sci, l'é nosc mestier. Se na di no i cognessa più aer poua, enlouta cognassane se n star junsom deldut a chejer.

Ma siede dalbon catives o ence ai Krampus ogne tant ge vegn l debolon?

Sion ben catives, ma ogne tant sion più sensiboi. Na uta l'é stat n bez che ge à dit a Sèn Nicolò "saludame mia giava" che la era giusta vegnuda a menciari. Aló n'é proprio vegnù l debolon.

Ma da n an a l'auter doventei più valenc i bec?

Ogne an i ne empromet, ma dapò l'an dò i é semper valives, enceben che sie semper più regai tant che l'agnol tel ceston no l'à più post e cognon ge i portar ence noi. Cognon bele se adatar a far dededut.

Scusame, ma co fajede a tegnir fora chela puza che aede dintorn?

Ma oramai se aon fat su l nas. Ne sà pa ence bon, l'é noscia puza.

Tant siede stac chiò?

Cater dis.

Doi dis a se chierir i bec più catives e dò sion jic stroz con Sèn Nicolò per ge far veder ai bec che sion semper vertesc a sutar fora.

Èl fadia chiò te Fascia?

Ensoma belebon, duc à massa dededut!

E ciarbon n'aede portà su n muie? Aede fat fadia?

Ah sci l'é fadia... fossa ben miéc portar sù gaselech con chel che l costa.

Ma n'èl vanzà mingol de chest ciarbon?

Na, assane cognù n portar su amò, ma no pa per i picoi... per i gregn ge n volessa.

A che durèdes pa la cedenes che ve tolede dò?

Mingol per far poua e mingol percheche a jir su per cheste rive se slizion se le trajon sot i pie.

E via per l'an che fajede?

Pusson e vardon de se ciapar endò su mingol de chela puza... che a star de fora la perdon! (vr)